





COPIE.

EENS SENDTBRIEFS
 der Ridderſchap, Edelen ende Steden
 van Hollandt / representerende die Staten
 vanden ſelfden Lande : aen mijn Heeren representerende die Staten vanden Lande van
 Verwaerds ouere.

Ien vermanende / om rendrachtelick / ten
 dienſte vande Coninckliche Maieſteyt / die Landen te
 helpen brenghen in haren ghewoonlicken
 voorſpoet ende vryheyt.



Psalm. lxxv.

Hoe langhe willet ghelieden onrecht richten / ende den per-
 ſoonen der Godtloosen voort trecken.
 Verlost den ellendighen ende den nootdriftighen: helpſe
 wt den handen der Godtloosen.

Ghedruet int laer ons Heeren,

M. D. LXXIII.

210

32

4792.

Hooghe / Edele / Seerweerdighe / Eersame /
 Wijse ende Voorzienighe goede Heeren / Vrienden ende Mede-
 broeders / &c.



Also wy vernomen hebben / dat den
 Hertoch vā Alba / die generale Staten nu wederom-
 me laet vergaderen / om aen de selue bystant en hulpe
 van gelt en andere nootsakelicheden / tot volueringe
 deses tegenwoordighen Crijchs / te versoeken: Soo
 en connen wy niet nalaten / van wegghen des schuldighen
 plichs / daer mede wy aen onsen ghemeynen Wa-
 derlande verbonden zijn / **W. I.** als onse medebroeders desen onsen brief te
 schryuen. Door gewis ende ongetwijfelt achtende / dat **W. I.** noch lief ende
 aengenaem wesen sal onse aduys ende trouwen raet te hooren / in het ghe-
 ne daer wy / door die eruaertheit der saken die ons dagelick vooruallen /
 eenichsins onderricht zijn: Want al ist sake dat wy door die boosheyt des
 tijts en insonderheyt door den bittere haet / misgouflicheyt ende quaetwil-
 licheyt eeniger vrienden / vā elckanderen voor desen tijt afghesondert zijn /
 ende door haer archeyt en schalcke practijcken / in Crighen ende Oorloge /
 teghens onsen wille en danck / gheraect: Des niet te min verhoppen wy op
W. I. discretie / ende op de natuerliche ghenegentheyt des Vaderlants / die
 ons allen vā moeders lijue aengeboren en inghewortelt is / dat ghylieden
 nimmermeer en sult connen vergheten / die goetwillige ende vriendelike
 trouwherticheyt / die wy deen den anderen hier voortijts alcht hebbē toe ghe-
 dragen / en noch toe draghē / voor Godt en voor alle mensche schuldich en
 van onsen tweege noch berept ende veerdich zijn: Sullet derhaluen oock
 vā uwen tweghē dat selue vermoeden vā ons hebbende / onse trouwe ver-
 maninghe sonder eenighe partijdeschap opnemen / ende inde weerschale
 der waerheyt ouer wegende / bedencken / ghelijck als die waerheyt is / dat
 wy geenē Crigh en voeren deen tegens den anderen / wāt wy elckanderen
 noyt int cleyne noch int groote misdaē en hebben / maer allen onsen twistē
 ende Crigh is alleē / en enckelick teghē die regieringe vande vrende Pra-
 tie / welcke wy al te samē hier voortijde eendrachtelick wt dese Lāden heb-
 ben geweert / ende elckanderen beloofst / ende alchts verstaē hebbē te wee-
 ren: Als te seer schadelick / ende de wterste verderffnisse vāden staet der
 gemeene Nederlāden wesende / daer aē syne Ma. so grootelick gelegē is.
 Nuust also / dat sy met vele valsche ende verbloemde aengene / misbruy-
 kende tot haer voornemē den name der **C. M.** en der Religie / die sy veyn-
 sen voor te willē staen / hebben **W. I.** tegens ons so verre gebracht / dat sy
 uwe goederen / v gelt / sū uwe lijf ende leuen genoegh gebruycken / tot on-
 ser vernielinge ende verderuinghe / omme haer seluen daer door meesters
 te maken / niet alleen ouer ons / maer oock ouer v lieden / en alle uwe naco-
 melinghen

melingen in alle eeuwichheit. **M**ē leest inde Roomsche Historien dat doer
 het volck binnen der stadt van **R**omen door eenen swaren twist verdevilt
 was en den **A**del teghē het ghemeyne volck also ghespannē dat de een
 partīe buuten der stadt op eenen berch gheweken was en wilden lieue
 den ghemeynen vrant laten inuallen dā dat sy met malcanderen eenige ge
 meenscapheit soudē voortacn meer hebbē willen houden. So isser eenen
 genaemt **M**enemus **A**grippa die hen een alsulcken exempel ofte gelij
 kenisse voorhiel: **A**ls dat hier voortgēde eenmael geschiet was dat die le
 denen des menschelicken lichaems in eenen misuerstant ende swarē twi
 ste teghens malcanderen geraet waren so dat die handē ende die voeten
 mitsgaders alle dandere wterste ledenē besloten ende gheresolueert warē
 den ledighē buych niet swarē sucrē arbeyt niet langer te spijsen waer door
 dat het gheschiede dat dē buych ghē voetsel meer crīgēde heer verstant
 en verleghe werde ende daer na het gantsche lichaem verswacht so dat de
 handen noch voeten geen werck meer en condē ghedoen waer door sy al
 te samen vā noots weghē wederomme ghedwongē werden haer onder el
 canderen te versoenen op dat sy al te samen vereenicht wesende het ghe
 heele lichaem mochte ghelijck als te voeren gheuoert wordē ende in het
 leuen onderhoudē. Dese ghelicknisse vā het Roomsche volck ghehoort
 wesende hebben sy vā stonden aen sonder langer betact haer laten ghe
 seggen en wetten **A**del versoenet wesende zyn wederomme inde stadt ges
 heert ende gelijckertant die wapenen teghē hare ghemeynen vrant aen
 treckende hebben hem niet allene van hare frontieren verdreuen maer
 oock hare stadt metter tijt ghebracht tot de groothē macht en voorspo
 edicheit daer in sy menige hondert jaren bouen alle andere sieden vander
 werelt ghesloereet heeft.

Voorwaer alderlieffste medebroeders hebbē dat volck vā **R**omē goede
 reden ende recht ghehad en ist hen wel ghegaen dat sy door dit exempel
 ofte fabel vā **M**enemus **A**grippa hier niet elckanderen in een sterck ver
 bondt vereenicht hebbē. **H**oe veel meer redenē hebben wy dat wy ons nu
 niet elckanderē verbinden en deen den anderen die hant biedē om ons al
 ghemeyne vrandē ende misgouerns niet gewelt te wederstaē beschic oock
 wt onse **L**āden te verdrūen en den **L**āden helpen wederbrenghe tot haer
 oude fleur voorspoedicheit en macht daer die vā te voeren door onse goe
 de eendracht so lāghe inne ghestaen hebben: **W**āt wy en hebbē deen den
 anderen niet misdaen noch en draghe (**G**odt heb lof) gheenen haer noch
 vrantchap tegens malcanderen daeromme dat wy ons van elckanderen
 soudē moghen of willen scheiden ofte afsonderen ghelijck als die van
Romen deden wy en weten gheē tweedracht tusschē ons te wesen: **M**aer
 die sake vā allen den beroerten onrusticheit en deser aengenomen wape
 ningen zyn die **S**paengiaerdē die vā buuten in dese **L**anden commende
 en veel al vā sobre vyle en cleyne conditie te wesende hen in dese **L**anden
 willen

willen doen reuereren/ hen metten rijkdommen deser Landen groot ma-
ken/ en voorts met een hoouerdigen moctwil/ en bloetdronckentheyt ons
in armoede te stellē ende regieren/ en alsulcx willen allen onsen goederen
ende het swet onses aensichts/ niet al tgene dat wy ende onse Vooruade-
ren/ niet bitteren arbeit versuert hebben/ tot hare wellust ende onnuttie-
heyt besteden: Ja ons/ onse vrouwen en kinderen/ ende alles wat wy lief
en weert inde werelt hebben/ sy tot hare lijf eyghenen/ ende slaucenen ma-
ken. En dat noch het anderswaerste is/ willen dat wy hen sullen rekenen-
ghe vā onsen sielen ende consciencien gheue/ om daer ouer na haren goet-
duncken te heersche/ ende daer eenighe onder hen nauwelijc en wetē ofter
eenen God inden hemel is/ noch en hebben nauwelijc een enkel woort
vā den Sone Gods Christi Iesu onsen eenigē Salichmaker ghehoort noch
gelesen/ daer willen sy onse gelooue en Religie straffen/ en onder het dech-
sel vā dien/ willen ons onder haer Inquisitie brengen/ die tegen die Ma-
ranen ende verloochende Christenen in Spaengien gebruyct wort. &c. om
ander alsulcken eenen dekmantel/ ons van allen onse Priuilegien/ Vrij-
heden ende oude herkommen/ die onse Vooruaders ons niet arbeidt/ ende
met haren trouwen dienst/ Ja met haer goet ende bloet hebbē verworuen
ende naghelaten/ gantschelick te beroouen.

Ende om dat wy sulcx niet ghesint en sijn te lijden/ maer willen lieuer
den laetsten man waghe/ dan dat wy souden van onse oude Regieringhe/
onder onsen aldergenadichsten heer/ den Coninck vā Spaengie/ onse na-
tuerliche Graue vā Hollandt/ die ons de voornoemde Priuilegien/ Vrij-
heden en herkommen seer solemnelicken besworē heeft/ willē afstaen. So
wilt v nu de Hertoge vā Alba met synen aenhanch wijs maken/ dat wy
teghē onsen Coninck gerebelleert sijn/ en wilt v ouerreden/ dat ghy v van
uwe natuerliche Lantlieden ende medebroeders afscheydēde/ sult werden
dienaers van haren moctwil/ scheprechtērs van hare wreetheyt/ en voor-
standers van hare oncuysche ende onbehoorliche begheerlichkeiten.

Daerom wilt doch/ lieue medebroeders/ de sake ernstelick ende rijpelic
bedenckē/ eer dat ghy W. L. onder sijn tyrannie noch dieper begheuet/ ofte
hem yet toestaet/ vā al tgene dat hy v liede in dese vergaderinge gemenpt
is voor te houdē/ en laet v doch niet geene ydel woorden die ooghe verblin-
den en het verstant benemē: Ghy zijt die Staten des Landts/ dat is te seg-
ghen/ Die voorstanders ende beschermers van haer Vrijheyt/ en van hare
Priuilegien/ welcke ghy liede schuldich zijt/ voor God en voor alle mens-
schen te verdedigen/ en te hant houdē/ so ghy niet en wilt meynedich wor-
den/ want sulcx hebt ghy lieden den Lande besworen/ ende daeromme zyt
ghy wt allen Steden wtgecooren/ op dat een regelick synen Stadt/ en ghy
al tsamē het gantsche Landt helpt voorstaen en verantwoorden/ tegēs al-
le die gene/ die het souden willen eenichsins vercontē ofte verongelicken.

Daeromme heeft oec onse genadichste heere de Coninck/ als Hertoge

van Brabant en van Gelder/ Graue vā Vlaenderen/ van Holland/ Zee-
landt/ Henegouwe/ Artois/ etc. In uwen handen/ in Gods des almach-
tigen tegenwoordicheyt gesworen/ dat hy ons alle onse Priuilegien/ Vrij-
heden/ Rechten en hercommen/ sal onuermindert en onuerkeert laten blij-
uē/ en de selue in alle haer punten onderhouden. Op de selue conditie ende
voorwaerdē/ hebt ghyliden hem indē name vande Steden/ ende der gant-
sche gheemeente/ tot onsen natuerlickē Heere en genadige Beschermmer en
Voorstander aenghenomen. So dat ghy v volck niet machtich en zijt/ den
Coninck selue/ so verre als hy (welck wy geenāns en verhoopē) tegens
synen Edt wilde doen/ de hant te houden ofte te lijden: Ja hy ontslaet v al
te samen/ en eē vegelich bysonder/ vā alle plicht des gedienslicheyt/ so ver-
re als hy tegens onse beswozene Priuilegien vet soude willen begaē ofte
attenterē/ en heeft een voor allen/ Ipso facto/ en dadelich gecasseert en te
niete gemaect alle Querichēdē en Officiere de welcke tot preuiditie ende
nadeel der seluer Priuilegien souden inghestelt ofte aenghenomē wesen.

Hoe soudet ghy nu dā connen toestaen/ dat een Hertoge vā Alba/ ofte
ander Spaengiaert/ die vā onsen natuerlickē Heerē bloet/ noch afcoem-
ste niet en is/ noch niet dese Landē eenighe gemeenschap hebben can/ hem
soude veruoorderen niet alleenlich alle Lantrechten/ Priuilegien en Vrij-
heden naer synē moettwille te nieten te doene/ maer eer uwen Name ende
auctoriteyt/ die hier voortijts by allen onsen Vorsten en natuerlickē Hee-
ren/ den Hertoghen van Bourgongien/ Brabant/ Graue vā Vlaende-
ren en vā Hollandt/ in grooter eerbiedinge ghehouden is geweest/ tot sy-
ne onmenscheliche tyranie ende moettwillicheyt misbruyckē. Die hooch-
losliche Voorfaten onses aldergenadichste Heerē des Coninck/ en hebben
noyt Trijch geuoert/ noch Biede gemaect/ Ja oock gheen Munte gella-
ghen/ noch selue so vele als een stuuer exactie den volcke opgelept/ sonder
der Staten raedt ende adujs/ Ja sonder haer consent ende verwillinghe
daerinne te ghebruycken/ ende hebben selue gesworen alsulcx niet te doe-
ne: Het welcke oock by hoochloslicher ghedachtenisse Kijser Carolus/
en onsen Coninck selue/ met haren Edt in uwē handen so beuesticht/ en
metter daet seer vlietich onderhouden: En nu liet ghy lieden desen vreem-
den Tyrant/ die v noch int minste noch int meeste niet aen en gaet/ v lie-
den ende uwen volcke sulcke lasten vā Impositiē ende exactien vā Trijch
ende Trijchlieden/ ende van allerley maniere van Tyranie ende verdru-
kinge op den hals legghen sal/ alst hem lust en ghelieft: Hoe soudet ghylies-
den ymmermeer sulcx voor Godt en voor eenighe redeliche mensche con-
nen verantwoorden? Tsoude meer dan te verwonderen ende te beclaghen
zijn/ dat onder den uwen/ en door tgantsche Landt/ onder so veel Heeren en
grooten Adel die van so eerlichen Stamme gesproten zijn/ niet een alleen
en soude zijn/ die een manlich hert int lijf hebbende/ deses Spaeschē Ty-
rans wreedtheyt ende moettwillicheyt soude deruē wederstaen: Ende al te
samen

samē sijn dienacks ende Lijfeyghē also ghewordē, oock hare tonghē ende lippen hem sulcks onderworpen souden zyn / dat sy niet en souden duruen spreken dan tgene dat hem liefghetal ende aenghenaem sy, etc.

Espsonder / also door zijne al te stoute opgeblasentheyt / ende onmensche-
liche wreetheydt / die Edele en hoochloflicher Heere van Egmont en van
Hoorn omneghebracht / en het Edele bloet dwelck sy tot dienste des Co-
ninck en haers Waderlandts / Na tot bewarenisse en weluaren vā v allen /
altijt gewillichlickē en mildelicken tegens dē vyant hadde gewaecht / noch
vergoten heeft: En hem niet geschroomt voor uwe ooghe / ende in uwe te-
ghenwoordicheyt niet synen bloetdorstigē sweerde te suppen / ende op een
schauot te storten : en daer toe so veel onschuldichs en vromer bloets / van
so menighe vande bestē Adels des Landts / en van so treffeliche Borgeren
ende Juwoonderen / van alderley staet ende conditie : Veneuen dat hy die
andere vrome / en Edele Princē / Graue / Heere / Edelē / en Borgeren / met
ontalliche menichte wt dē Lande verdreue heeft : Om dieswille dat sy lie-
den / ghelijck ghy lieden ende wy lieden / ghepoocht hadde ende ghesint wa-
ren gheweest / die Lande vande Spaensche Inquisitie te beurhde / en te be-
houden in hare oude gherechticheden / loslike Priuilegiē ende ghebruy-
ken / tot eere ende dienste vā onse Coninck / door welcke rigeur ende crudel-
te / hoe wel des Hertoge vā Alba hope en meeninge wel is geweest sul-
ckē ontsich ende schrick onder allē mensche te makē / dat hy voortae na synen
lust alleen / metten zynē soude regieren / en den staet en sake vanden Lande
tot zynen welgheualle ende inuesten profijt te verstellē ende te verkeeren.

So en dencken wy nochtans niet / de herten ende tghemoet / van allē an-
deren so veel ouerghebleuenen / sulcks verflouuet en verkeert te zyn / dat
ter gheen Heeren / Edelen / Ouericheyden ofte Burgheren en soudē zyn /
die t Waderlant lief hebbende / tselfde / ende den arme ingesetenen van dien /
soudē willen helpē voorstaē en beschermē / vā al sulcke wreede meeninge /
sonderlinghe als nu ter tijt dat tselfde / met goeden succes by ons is aenge-
heuen : Myn Heere ghy siet hoe dat dese cleene Prouincie van Holland is
houdēde / hoe dat God de Heere ons teghē de verwoetheyt deses Tyrans /
die ons al te samen in een ooghenblich gheerne soude vernielē so hy con-
de / so wonderlickē heeft bewaert en beschuttet / ghelijck als hy (synē naem
sy ghelooft ende ghedancht inder ewicheyt) noch tegenwoordelickē doet /
hoe wel den Hertoghe van Alba / allen sijnē Spangiaerden / en Italianen
(dwelcke inder waerheyt niet so seer te vreesen zyn / als sy ouer dē verwon-
nen ende beangstē hen straf thonen) fortse ende ghewelt heeft op Holland
heeft aenghewent ende ghekeert.

Indien de stad van Amstelredā die dat Spaensche Garnisoen vanden
Hertoghe van Alba altijt hebbē gherefiscert / ende oock met groot gelt
moetē wtcopē / die oock op der exactien vande tiendē Penninck die meeste
swaricheyt hebben gemouert / ende Aegheus de executie van dien metter
daet

baet geoppoſeert. In heere voornemē, daer toe ſy anderen oock hebbe ver-
weckt / ſtantaechtich hadden ghebleuen, ende heimlieden niet hadden laten
midſeyden omme den vanden vā heere vaderlant niet alleen inne te late,
maer oock alle hulpe en byſtant te doe, voormaer den Hertoghe met zynen
Chriſchſuolck ſouden hen hebben gewacht Hollandt aen te grēpen.

Oefghelijcken, hadden die van Aiddelburch tot noch toe, haer niet la-
ſen bedrieghe, ende met valſche voornendinghen des Hertoghe, en zynen
aenhancks in het net late brenghe, hy en ſoude voormaer met een vā zyn-
en Spaengiaerde leuendich wt Walcherē opt hebbe gebracht. Syndelick,
hadden eenige Souuerneurs, veel heeren, Eddelen en oncedelen gheble-
ue by hare gheſintheyt en propooſten die ſy voor den ghemeenen man wel
hebben laten ſchijnē ende luyde, omme andere tot wederſtant van des hee-
toghen regeringhe te animeren. Voormaer den Hertoghe ſoude van zynen
quaet opſet hebbe moeten afſtaen: want van waer heeft die van Alue doch
alle zynen macht ende gherwelt daer hy hem ſo trotzich op beroemt: anders
dan van v luyde, ende van Stede des Nederlāts, van waer alle behoefſten
van Schepen ende ſchipruſtinghen, van waer tgeelt ende de wapenen, Ja
van waer comme hem ſo grooten hoopen van ſoldate: dan wt deſe Neder-
landen ſelue: is dat niet wel beclaghelick ende erbarmelick, dat dit arme
Landt zyn eyghen goet ende bloet eenen vreedē Tyrant by ſtelt, ten eynde
de dattet in eenen ſchendighe ewighe ſlavernie ende dienſtbaerheyt van
vreemde Naticen mach gebracht worden, Ja zynen eyghen Landſatē ende
Inwoonders vermoort ende verniet.

Hoe is nu dat arme Nederlandt ſo ſeer veraert ende verbaſtert: waer is
het Edel ghemoet van onſen vromē Voornaderen: die noyt en hebbe wil-
len gedooget dat eenige vreedē Naticē heerschappie hier int Landt ſouden
voeren, Ja geene Officie noch ſtaten bedienen. Twelck altyts met alder
neerſticheyt, ende niet ſonder moepte ende pijn, inmers noch in ſo corten
Tare is wederſtaē en afgewert, deur diē ſelue altyts verſtaē is geweest,
de ruinevande Nederlandt, als wel voorhē en gheſeyt is geweest, en nu,
God betert, blijet wat totter regeringe des Hertogē vā Alba is geuolcht,
als dononentſchap metten onliggende Coninckrijcken en naghbuuren,
verachteringe vande Coopmanschap en hant werken, daer by het Ne-
derlant en die rijkdomme van dien is ſtaende: en ten laetſten, vernielinge,
verriagen ende vermoorden vande inwoonders der ſeluer Landen, inel-
ſulcke affectie als vreedē Landen draghende zyn, ſonder aenſchou van
twelken vanden dienſt van zynen Maerſtey.

Nietemin, dit ouergheſlaghen, lieue medebroeders ende die ſaechen inde
teghenwoordige geſtelt aenmerckende, ſo mocht ghyliede hē dat God de
heere zyn hant ſtreckt, ende en laet ons onſe vanden niet tot eenen roof
noch tot ſchande worden. Waerom en grēpt ghy als noch dan niet eenen
mannelickē moet: ende voucht u te ſamē met ons, omme ghelijckertane

Die

dit onrechtuerdich ende onuerdragheleken Jock / van onser alder halven
 int ghemeeen eens af te werpē: Want so den Hertoge tot noch toe / so wep-
 nich heeft comen wttrichten / daer wy teghen malcanderen opgheset zijn
 geweest / en daer het meestendeel des Lāds hem heeft bygestaen / wat sal
 hy noch connē doen / indie wy met eendracht ende eenwillicheyt / ons hou-
 dende onder de wetteliche gehoorzaetheyt des Conincklike Maesteyts /
 onses ghenadichste Heeren / dese vreemde dominerende Tyrannē en heer-
 schers wt den Lande verdragen / en onse oude Rechten en Priuilegien met
 alle ernsticheyt / ghesacnderhant voorstaen en beschermē. Ende so hy dat
 slepne Landeken vā Hollant met een deel vā Zeelant / niet en heeft con-
 nen onder hem brenghē / in so langen tijt / ende met alle dat ghewelt dat hy
 in Italiē / Spaengien / Duytlant / Brancckerijck / als wt dese Nederlāden
 heeft connen te samen rapen / wat sal hy dan connen wttrichten / so verre als
 hem Brabant / Vlaenderē / Geldre / Brabant / Guerijsel / Artois / Vene-
 gouwe / Luxemburch en andere Prouincien des Nederlāds / ofte een deel
 der seluer / by Hollant en Zeelant in eendrachticheyt willē voegen / en hem
 gesacnderhant wederstant doe: Doormaer wy en twijfelē niet / ofte wy en
 soude wel haest met Godes hulpe der saken meesters wesen / en onse ver-
 dructe Vaderlant wederomme in / zijn oude fleur ende weluaren gebrochte
 hebbē: wāt alst al wel ingesien wort / so ghy liede slechs uwe hulpe wilidet
 te rugge houden / Na al en wilde ghy oock nemmermeer sweert tegē hem
 wttrechē / wat soude hy connen wttrichtē? nademael het openbaer is / dat
 alle syne sake anders niet en zijn / dā een ydel hooueerdich wtwendicheyt
 en gelaet / daermede hy v lieden veruært maect / ende met valsche versterde
 aendieninge so verre brēgt / en met subtilicheyt door enige zijne Instrumē-
 ten ofte medehulpers so verre doet brēgē / dat ghy hē uwe gewelt in hāden
 geeft / waermede hy syne moetwil en Tyrannie / ooc tegē v lieder aduys /
 en als wy niet en twijfelen / tegens de goede meeninge vā onsen Coninck
 te weghe brengt. Ghy moget noch in versche gedachtenisse houdē / hoe
 dat hy int voorleden Jaer / inde vergaderinge vande Staten / des Maents
 Augusti / v lieden al te samen proponeerde: Als dat die C. Ma. wt Spaen-
 gien hadde afghesonden / die somme vā thien hondert duysent gulden: En
 dat het selfste was / het alderwoterste dat hy wt Spaengie hadde te wach-
 ten: Ende daer op maecte hy v liede wijs / dat hy soude twaelf Regimenten
 Duytsche knechte / vyftich Wendelen Spaengiaerts / C en L. Wendelen
 Walē en Nederlāders / en daerenbouē noch thie duysent Duytsche Aup-
 ters / en drie duysent Peerde vande Benden / en noch twee duysent lichte
 Peerde: behaluen noch eenen grooten hoop oorlochschepen / en sonder de
 S: dinaris Garnisoenē hebbē opgebracht. Vermetende hem seer stoutē-
 liche / en v lieden vast toeseggende / dat hy alle syne vyandē binnē ses we-
 ken / ofteten alderlanckste binnen twee maenden / wt alle dese Nederlan-
 den soude verdreue hebbē: Segeerende alleē / dat ghy liede sout toesiē gelt
 op te

op te brengen/omme het volc daer na te betalen/ op dat sy v lieden niet en
souden op den hals blyuē ligghē/ en het gantsche Landt ten gronde op eten
en verderuen. Waer op den Hertoge vā Medinaceli/ die aen syne sinckie
hant geseten was v lieden ooc toefeyde/ dat hy van synen tweege niet en
soude nalaten/ den Hertoge vā Alba met lijf en goet tot het wterste toe by
te staen/omme het selfde dat hy beloofte hadde na te comen/ etc.

Nu latē wy v selue richten/ of hy alsulcx in het minste volbracht heeft/
wy laten staen dat hy sulchen getal vā volcke by seer veel na/ noyt heeft
comen op die beene brengē/ maer dat meer is minners openbaertlicheit/ siē/
dat niet allentich die ses weken/ maer die twee maende al langhe voorby
zijn/ Na dat alreede het tweede Jaer voorhāden is/ en noch is hy also ver-
re vā syne rekeningē als hy opt te vooren geweest is. Waer wt men mer-
kelich can afmeten/ dat hy anders niet en soect/ dan met een valsche voor-
wendinge ende persuaasien/ ghelt vā v lieden af te dringen/ om den Grich
inde lengte te slepen: Ende maect hierentusschen den Coninck veel din-
ghen wijs/ waermede hy syne Maesteyt in groote sware costen brengt/
omme eenen schadelicken Grich tegens syne eygene Onderfaten/ sonder
eenighen noot te voeren: hoe wel het ghenoech kennelich is/ dat hy het
selfste gelt dwelch hy ontfangt/ geenfins aen en leyt tot betalinghe syner
knechten/ gemerct dat hy den Spaenschen knechten ouer die achtentwin-
tich/ ende die Duytsche ouer die dertien ende veertien maende besoldinge
schuldich is ghebleuen. So dat het niet te vergheefs en is/ dat/ so hy selue
inde voorghemelde vergaderinge der Staten verclarde/ dat den Coninck
hem ontboden hadde/ dat hy geen gelt meer wt Spaengie en hadde te ver-
wachten/ behaluen die thien hondert duyfent gulden/ die hy alsdoen ver-
clarde ontfanghen te hebben. Ende daeromme/ siende dat hem nu allen
trooste van elder ontbreect/ so neemt hy synen wterste toculucht tot W. L.
ende heeft v daeromme teghenwoordelicken doen vergaderē/ omme v lie-
den bouen alle die ontalliche en onuerdraghelicke costen/ daermede hy het
Landt tot noch toe beswaert/ en tot de beene/ Na tot het merch vande bee-
nen toe heeft wtghesoghen/ noch niet de somme vā twintich hondert duy-
fent guldens tsaers te belasten.

Maer lieue medebroeders/ siet doch wel toe wat dat v liede te doe staet/
en en denct niet anders/ of die C. Ma. en synen staedt vā Spaengien/ ofte
minners syner Co. Ma. erfghenamen en nacomelinghen/ sullen ten laet-
sten eenmael die gantsche sake naer der waerheyt willē verstaē/ en goede
rekeningē van alles hoorē/ sonder haer meer te laten benoegē met de ver-
bloemde aduertissementē/ die sulc tot noch toe vande Hertoge en van synen
aenhanch alleen ontfangē hebben: En al sinen dā inder waerheyt beuinde
sal/ dat desen Grich/ beneuen so grootē onkosten/ die den Coninck en den
Landen ontwijfelich ouer die twintich Millioenen alreede comē te staen/
noch tot sulcke onuerhalliche schade ende verlies van volcke/ van Steden/
Dorpen

Dorpen ende Wlecken syne Co. Ma. toeghedaeu/ gheuoert wort/ alleene
wt enckelen moetwille des Hertoghē/ die alle getrouwe Onderfaten des
Coninck/ teghen alle recht ende redene geerne soude gantschelick onder-
drucken: So en twijfelt niet/ of het sal den Coninck grootelic verdrictē/
ende hy alsulcke groote schade ende verderf zinder Erflanden willē ver-
halen op die gene die oorsake daer van gewoest zyn/ ofte hulpe ofte bystāt
daer toe gegeuen hebbē. Wāt so ghylicden noch voortacn met dē Spaen-
schen Tyrant/ teghens uwe eygene Landsfaten/ ende uwe eygene Vader-
lant spannet/ ende hem bystant doet met ghelde ende andere gelijcke mid-
delen/ voorwaer daer moet nootsakelick van dese dry poincten/ het eene
volghen: Of dat desen Crjch noch eenen tijt lāck also blijue staende tus-
schen beyden/ gelijck als hy tot noch toe/ ouer anderhalf Jaer tijts gestacn
heeft: Ofte dat Godt ons de ouerhandt en volle victorie ouer onse vpan-
den gheeft: Ofte eyndelick dat hy de victorie ouer ons crjcht.

Nu ist gewis/ dat in allen dese dry poincten het verderf en onderganck
des Lādes nootwendich ghelegghen is: want hy also dat die saken noch ee-
nen tijt lāck aldus bliuen staende/ so moet ghy bedencken dat hierentus-
schen/ duerende desen grimmighē Crjch/ die Neeringe gantschelickē ver-
gaet/ die Coopuaert stille staet/ die hantwercken ophouden/ en daer deure
het gantsche Landt also verarmt en verbijstert wort/ dat het ontwijfelick
gheschapen is/ in eenen swaren hongers noot en dicke te vallē: waer wt
anders niet dan Oproerten ende Seditien/ sware Cranchheden en Pestil-
entien/ mits welcken het Landt gantschelicken sal verwoest worden/ te
verwachten staen.

Beneuen dat hierentusschen het Landt van hollant ende Zeelant/ ende
alle onliggende Landen/ van het Crjchvolck opgeteert en wt den gron-
de verdoruen weeden. Waer door dat noch Grabant/ noch Vlaenderen
eenich boter noch karse/ noch ander gewoonlike Prouande/ noch sout en
sal comen becomen: welcke Landen ooc voor haer deel van Cruyters ende
knechten wtgeteert wesende/ in eenē wtersten iammer en ellende/ nootsa-
kelick sullen vallen/ en daerenbouen sal alderley plonderinge en beroouin-
ge/ Ja afbrandinghe van Steden/ Dorpen ende Wlecken/ syne Co. Ma.
toegedaen/ ghepleghet worden/ nademaet dat desen inheymischen Crjch
alsulcks nootsakelick mede brengt: Ende dat noch het alderarchste is/ hy
also/ dat geduerende desen Crjch/ die Dijken door storm ende onweder/
comen in Zeelant ofte hollant/ in te breken: ofte dat eenighe vande par-
tijen/ door desperatie van in haerder vpanden handen niet te comen/ de sel-
ue doorsteken: so en cammen niet anders daer wt verwachten/ dan beneuen
die iammerelicken doot vā so menige duysentich duysent menschen en bee-
sten/ een ewich ende onuerhalick onderganck der seluer Landen/ waer
omme dat syne Co. Ma. ende alle syne nacomelinghen in een ewighe
schade sullen gheraken.

Ten anderen / by also dat ons Godt die ouerhant en victorie ouer onse
 vanden geest / so en can dat enen wel niet gheschieden / sonder eenen sam-
 merlicken moort ende vernielinghe vā eenen onsalighen hoop der goeder
 Inwoonderen / die den Hertoge vā Alba tot synen dienste gebruyct / wāt
 het wel verskeret is / dat so langhe als hy gelt en volck sal comen berou-
 me / so en sal hy nemmermeer af houden alle middelen te soeken / om ons
 gantsch en geheel wt te roepen en te vernielen: So dat hy nemmermeer en
 sal werde tondergebracht / sonder eenige afschielike groote bloetstorting-
 ge / beneuen alle andere Inconuenienten / die noch hierentusschen / gedue-
 rende den Crijch so wy bouen verhaelt hebben / den Liden sullen weder-
 uaren: Maer by so verre dat hy de ouerhant ouer ons crijget (droelt God
 door zijn barmherticheyt verhoede wil) so zijt ghy al te samen wel gewis /
 dat v lieden anders niet te verwachten en staet / dan een eeuige en schen-
 dige slaernie / ouermits hy v lieden alle te samen / en alle de Steden voor
 rebel en wederspannich sal houden ouermits die weygeringe des tienden
 Penning: Waer wt dat hy hem laet duncken dat desen laetsten Crijch al-
 dermeest gheresen is. Daeromme sal hy ontrouwelicken achten / dat alle die
 gene / die haer daerinne geweygert hebben / al ist sake dat sy niet opentlick
 die wapene teghens hem geuoert en hebbē / nochtans syne openbare vva-
 den en wederspannige zijn / als die ghene die hem dit spel gheroet hebben /
 false daeromme metten sweerde ende metten viere niet anders tracteren /
 dan ons / die hem opentlick wederstant met wapenen gedaen hebben / niet
 twijfelende / of die andere souden wel het selfste hebben ghedaen / so sy den
 moet / ofte die gheleghentheyt / oft die macht hadden ghehad: Hoe wel dat
 wy wel verhoppen / dat hijt so goeden coop niet hebben en sal / als hy wel
 meent / wāt wy gantschelicken geresolucert zijn / deene Stadt voor / en dan-
 der naer / Ja den lesten man te waghē / eer dat wy in eens alfulchen vren-
 den en wreeden Tyrants handen / ons souden willen ouergeuen: So dat hy
 nemmermeer daer toe comen en sal / sonder het Landt inde selue Inconue-
 nienten die wy verhaelt hebben / merckelicken te brenghen.

Waer wt het claerliche blijct / dat in allen geualle / by also verre als ghy
 lieden hem / noch langer in desen Crijch helpt en met gelde bystaet / indien
 dat ghy hē niet en verhindert / en opentlick in zijn voornemen wederstaet /
 so en can onse arme Vaderlant haer wterste verderf en verwoestingē ge-
 sins ontgaen: want op dat ghy wetet wat hy inden sin heeft / en hoe hy met
 des Coninc Landen / en met ons allen voorghenomen heeft te handelen /
 so bemerct het ghene dat hy ons in syne Pardoembriuen / met wtgedruete
 woorden dreyget / seggende / dat so wy ons niet en willen onder syne ghe-
 hoorfacinheyt mede begeuen / so sal hy dit gantsche Landt also verwoesten
 en verderuen / datter gheene Reliquien en sullen ouer bliuen / ende dat het
 ghene dat nu noch eenichsins gheheel is / gantschelicken sal worden ver-
 nielt / en tot aen den wortel toe wtgheroeyt: Ja dat hy dit Landt / so verre
 alffer

alſſer noch eenich Landt ſal ouer bliuen / met vrende ſtallen ſal doer be-
woonen: met andere dierghelijcke dievgheimenten / waer mede hy opent-
lick te kennen gheeft dat ſyne woterſte meyninghe is / dit gantsche Landt
tot de gronde te verderuen ende vernielen &c.

Nu vragen wy v lieden / indien dat ſulcx gheſchiede (daer van ons God
almachtich verhoeden wil) wie ſoude anders die ſchuld hebben dan ghy lie-
den alleene: die hem tot ſynen boosen moedwil / ten woterſten verderue van
v eyghen Vaderlant met ghelt / met volck / met ſchepen / met munitie / met
prouande / ſo langhe hebt bygheſtaen ende noch byſtaet / hoe ſout ghy dan
ſulcx hier namaels voor die Co. Ma. oft minners voor ſyne nacommingen
commen verdedighen: Of meyn ghy / om dat v den Hertoge ſomwij-
len een blanck Signet met des Coninck hant gheteekent laet ſien / ſchrij-
uende daerinne wat hem geluſt en ghelieft / ende ſeggende dat het al verſch
tot Spaengien comt / dat ghy daer mede des Coninck ofte ſyner nacom-
mingen rechtueerdighen toorne ende wraake ſoudt comen ontgaen: Mer
ghy voorwaer: want al ſaecht ghy ſelue des Coninck brieuen met zijn ey-
ghen hant gheſchreuen / en waert wel verſekert dattet van ſyne Maieſteyt
ghecommen ware: Nochtans / nademael v lieden ghenoech bekend is / dat
ſyne Maieſteyt vander ſaken naer de waerheyt gheenſins berecht en is /
en niet voordere en weet vanden teghenwoordighen ſtaet des Landts / dan
voor ſoo vele als hy vanden Hertoghe ende ſyne toegedane geinſormeert
wort: So en ſout ghy in ewichheyt neimmermeer comen verantwoorde /
dat ghy aldus des Coninck beſte Erſtanden / ende ſyne ghetrouwe On-
derſaten / ſo ianmerlick latet verloren ende verdoruen gaen / bewijle ghy
als Staten den Landts / behoorden na uwen Eedt een opſicht daer op te
hebben / ende den Coninck ſelue (die in uwen handen geſworen heeft het
Landt te beſchermen ende te beſchudden / ende in alle ſyne Priuilegien te
handthouden) beter te berichten: Ofte anders zijt ghy wel verſekert / dat
of ſchoon noch ſyne Coninckliche Maieſteyt / noch ſyne nacommingen
alſulcks niet en ſtrafeden / ghy en ſult nochtans in ewichheyt / die alder-
hoochſte ſtraffe des almachtigen Godts / ende Coninck aller Coninghen
neimmermeer ontgaen: Bewijle hy v gheſtelt heeft tot beſchermers ende
beſchutters uwes arme Vaderlandts / dwelck nu voortan roept uwe hul-
pe aen / met grooten gheſchrey des gantschen volcx. Want ghy zijt int af-
weſen des Coninck / die ghene die des Coninck plaetſe behoort te houde:
Ende gheen Gouverneur noch Stadthouder en mach alſulcken Trich
niet voeren ſonder uwen wille ende conſent / want ſoo den Coninck ſelue
gheſworen heeft / gheen Oorloghe teghens vrende te voeren ſonder uwe
verwilliginghe: hoe veel te min ſoude dan een die ſelue vrendelick is /
ende noch den Coninck / noch den Lande int minſte beſtaet / onder deck-
ſel dat hy hem voor en Stadthouder des Coninck wtgeeft / eenen alſulcken
ſchadelicken Trich mogen voeren / tegens die eyghen Onderdanen zinnre

Maesteyt, om de selue metten viere mette swerde, ende met honghers
noodt, soo als hy ons met wtghedruchten woorden dreycht, nae synen
moetwille te verwoesten ende te verderuen.

Tot dien eynde, voordert hy nu van v lieden dese twee Millioenē, ma-
staet de sake in urwen handen en in urwen keure, so ghy hem te wille staet,
ende zyne hooge woordē en dreyghementē ontfiet, so sult ghy dit gantsche
Lant in een ewige slaueernijē, Ja in eenē iammerlickē en noyt gheoorde
verwoestinghe, binne corte tijt ontwoiffelich bringhē: ende v salmen voor
God en alle menschen schuldich makē, van alle dat bloet datter noch ver-
goten sal worden, en vā allen den iammer, ellende ende wterste armoede,
daer so menighe wedurven ende weesen, so menighe beiaerde oude Wader-
ren, so menige arme bedruchte kinderckens, tot haer wterste verderf inne
sulle comē, ende alle dit gheschrey, dat clagē ende huplē, sal ouer v luyden
wrake roepen voor Gods aenschijn: ghemercht, ghylieden die behoorden
Woorstanders des volcx en beschermers des Lants te wesen, den Tyrant
in zyne verwoede Tyrannie sult hebben voortgheholpen.

Oock sullen op v vallē alle die veruloeckinghen en vermaledijdinghen,
van onse ende urwe nacomelinghen, die in eeuwicheyt sullen den dach ver-
uloecken, dat den Spaenschē Tyrant hier int Lant zynē eerste voet gesedt
heeft, om ons en haer al te samē in eene so iammerlickē slaueernie te bren-
ghen, ick late staen, de oneere ende schande, die ghyliedē dan sult behalen
by allen vrende Natien, Volcken, Steden, Coninghen, Vorste en Po-
tentatē: als dat ghy die auctoriteyt en macht die v Godt en het Lantrecht
gegeue heeft, noyt en hebbet doruen teghē eenen Spaenschē Tyrant, tot
bescherminge en behoudnisse urwes Vaderlants, en tot verbedinge haer-
der Vrijheyt en Priuilegien, int werck stellen: Ja ter contrarien hebt die
selue misbruicht, om v eyghen volck, twelck ghy behoorde in syne Lant-
rechten, Vrijheden ende Priuilegien beschut ende beschermt te hebben, in
eene ewige slaueernie en ellēdige cattiuicheyt, die swaerder sal wesen dan
eenigē doot, wt enckel slappicheyt vā hertē en cleyuinoedicheyt te brengē.

Dacrenteghen, so ghy lieden desen Tyrant, synen onredelicken eyse
niet alleenlichen aflact, maer oock selue die sake ter hertē neemt, en urwe
Officie, Raem, Wippt, ende auctoriteyt na urwē Ede en schuldigē pliche
betrachtende, v eyghens Vaderlandt in syne Rechten, Vrijhedē, en Priui-
legien voorstaet: en in stede dat hy nu twee Millioenen gouts Jaerlickx
eysschet, omme het Landt te verwoestē ende te verderuen, sachs een Mil-
lioen, Ja een half Millioen, op eenmael wilt besteden, om het Landt te
bewarē, en die vrende Tyrannen wt te helpen driuen, om het Lant in een
goede vrede en eendrachticheyt, ende tot zyn oude fleur, voorspoet, en wel-
uaert weder te brenghe: So sullet ghylieden voorwaer God almachtich,
der Coninckliker Maesteyt ende urwen Vaderlande, een grooten aen-
ghenaemen dienst doen, ende v seluen by alle Natien, ende volcken,
ende

ende by alle vriende Heere ende Potentaten / eenen loffelicken roem ende heerliche naem ghe winnen: Als dat ghyliede als goede getrouwe Waders des Waderlants / den aenstaenden ianuner ende ellende desselfs geweert / den Erijch ghestilt / de Vrede wedergebracht / de Reeringe en Coopmanschap weder opgericht / alle Handwercken ingheael / den Rijckdom ende alle voo:spoedicheyt gep:ocureert hebt: Ende moget wel voo: selier ende ghe wis houden / dat by also verre / W. L. hierinne verstaen wille / dat alle andere swaerichede ende beroerten die inden Landen moghen gherefen zijn / met goeden ghemeen aduys en raedt naer ouden hercommen / lichtelich sullen werden beslecht / midts wy ons tsamē als getrouwe nabueren ende medebroeders / in alle billichheyt ende redelicheyt deen tegens de anderen / tot voo:deringe van tgemeene beste / cere en dienste van sone Ma. sullen dragen: Sulce dat ghylieden inder waerheyt beuinden sult / dattet al valsche ende versierde loghenen zijn / die onse ghemeene vanden ons nagheuen / om ons van v lieden / ende v liede van ons / af te scheyden / als dat wy rebellen ende afuallighe vanden Christelicken ghelooue / ofte vande ghehoor:saemheyt des Coninck op souden gheweest zijn: Want wy noyt yet anders ghesocht en hebben / dan onse wettelike Wighheyt / ende onse Landtrechten die ons van onse Coninck beswoeren zijn / teghens alle vriende Tyrannen te hanthouden (gelick als onse Voomaeders ons gheleert ende met haer eyghen exempel hebben voo:ghEGAEN) ende onse conscientien na Godts beuel te reguleren: Stellende onse vertrouwen op Godt / ende op synen Sone Iesum Christum / ende soeckende hem na onse crancke vermoghen te dienen / ghelick als hy selue in zijn W. Woor is eysschende: Ende voo:ts die Ouericheyt in alle erebiedinghe ende reuerentie na Godts beuel houdende / de selue alle gehoor:saemheyt biedende / ende onsen naesten in al tegene ons moghelick is / dienende: Het welcke ghylieden selue (so wy ons ghenoech tot v versien) also sult bekieken: Als men de saecke inde rechtueerdicheyt sal examineren / kennen ende oordeelen: Ende wy teghens alle valsche beschuldighe / by onpartidighe Rechteren moghen worden ghelooft.

Esoude voo:waer wesen teghens die natuere ende conditie van die van Hollandt / dat sy lieden hen vergrepe ofte misdacn hebbende / haer misdac niet en soude bekieken / ende daer van in alder ootmoet gratie ende ghenade versoecken. Men heeft ons noyt gheacht / ofte ghesien so obstinaet / oft hertneekich in onser voo:nemen ofte voo:tsiel / maer in allen saecken daerinne wy sone Ma. iestept hebben connen ghelieven / lichtelick laten beleyden. Wat Natie ofte Prouincie isser gheweest / die in allen behen ende subuentien te consenteren ter petitie van sone Co. Ma. goetwilligheliker is geweest / dan die van Hollandt: Na so sacht en goetwillich diemaelo sy geweest / dat sy by andere Prouincie omme terrempels wille / hat hebben veruyt ende ondanc ghelydt: Wat Onderfaten hebben in allen voo:gaende

voorigaende Orlogen meerder ghetroonvicheyt bewesen als die vā Hol-
lant, in heure respect, als v lieden, en voor alle die werelt kennelich is, en
wy wel verskert duncken te zyn, dat wy van gheerne ongehoorsamheyt/
rebellie ofte ontroonvicheyt schuldich bevonden sullen worden, ten ware
byden Hertoge en synen bloetracht, die alle ordene vā Justitie altyts ge-
nuerteert, allen Quericheyt, Richters, Officier en Wethouders ver-
smaect, en allen saken naer hare affectie hebbē wtgericht, des hen die goe-
de ende vrome dickmaels hebben beclaecht ende beschrept.

Verhaluen goede Heere en lieue medebroeders, wilt doch de sake ern-
stelich ouerlegghen, wilt alle cleyuordicheyt en wyluiffche slappicheyt
van u werpen, en eenen mannelicken moet grijpen: wilt tsamen niet ons
als met uwen Lantslieden, ja met uwen broeders en eyghen vleesch ende
bloet, die hant houden dat onse arme verdruete Vaderlandt, eenmael van
vriende Tyrannie verlost wesende, na syne oude Rechten, hercomen en
Privillegien, onder die gehoorzaamheyt des Coninc onses allerghena-
dichsten Heere, in cene ghewenschede Vrede en eenicheyt, en tot hare ou-
de fleur en voorspoedicheyt mach ghebracht worden: daer toe wy niet en
twifelen, Godt almachtich sal v lieden en ons alle syne Goddelicke hul-
pe ende handt reychen, tot vermeerderinghe synes Rijcs ende Glorie.

Hooghe, Edele, Seerterredighe, Erfame, Wyse ende Voorzienighe
goede Heeren, Vrienden ende medebroeders, Godt almachtich neme v in
zijn heylighe bescherminghe. Gheschreuen tot Delft, den xij. Septem-
bris. Anno M. D. Lxxij.

Onder stont gheschreuen: Dwe goetwillighe Vrienden ende Medebroeders,
Die Ridderchap, Edelen, ende Steden van Hollandt, represen-
terende die Staten vanden seluen Lande. Noch stont onder ge-
schreuen: Ter ordonantie der Staten:

Ondergheteeckent

W. Perchijn.

